

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

R J E Š E N J E

**po Prijavi namjere koncentracije između privrednih subjekata PHOENIX PIB Austria
Beteiligungs GmbH, Beč, Austrija i Pharmanova Bel d.o.o., Bijeljina, Bosna i Hercegovina**

**Sarajevo
Decembar, 2008. godine**



Broj: 01-02-26-041-8-II/08
Sarajevo, 23.12.2008. godine

Na osnovu člana 25. stav (1) pod e) člana 42. stav (1) pod d) u vezi s čl. 12., 14., 16. i 18. Zakona o konkurenciji («Službeni glasnik BiH», br. 48/05 i 76/07), po Prijavi namjere koncentracije između privrednog subjekta PHOENIX PIB Austria Beteiligungs GmbH, Albert-Schweizer-Gasse 3, 1140 Beč, Austrija, zastupanog po advokatu Marijana Kulenović, Vase Pelagića 48, 78000 Banja Luka, Bosna i Hercegovina i privrednog subjekta Pharmanova Bel d.o.o., Stefana Dečanskog bb, Bijeljina, Bosna i Hercegovina zaprimljenu pod brojem: 01-02-26-041-II/08 dana 06.10.2008.godine, Konkurencijsko vijeće, na 79. (sedamdesetdevetj) sjednici održanoj dana 23.12.2008. godine, je donijelo sljedeće

R J E Š E N J E

1. Ocjenjuje se dopuštenom koncentracija koja će nastati na tržištu veleprodaje farmaceutskih proizvoda u Bosni i Hercegovini sticanjem kontrole kupovinom 100% vlasničkog udjela od strane privrednog subjekta PHOENIX PIB Austria Beteiligungs GmbH, Albert-Schweizer-Gasse 3, 1140 Beč, Austrija u privrednom subjektu Pharmanova Bel d.o.o., Stefana Dečanskog bb, Bijeljina, Bosna i Hercegovina.
2. Ovo Rješenje o koncentraciji upisuje se u Registar koncentracija.
3. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 06.10.2008. godine zaprimilo Prijavu namjere koncentracije broj 01-02-26-041-II/08 (u daljem tekstu: Prijava) privrednog subjekta PHOENIX PIB Austria Beteiligungs GmbH, Albert-Schweizer-Gasse 3, 1140 Beč, Austrija (u daljem tekstu: Phoenix Pib ili Podnosilac prijave), zastupanog po advokatu Marijana Kulenović, Vase Pelagića 48, 78000 Banja Luka, Bosna i Hercegovina, po kojoj namjerava kupiti 100% vlasničkog udjela u privrednom subjektu Pharmanova Bel d.o.o., Stefana Dečanskog bb, Bijeljina, Bosna i Hercegovina (u daljem tekstu: Pharmanova Bel).

Uvidom u podnesenu Prijavu utvrđeno je da ista nije uredna i kompletna, u smislu člana 30 stav (1) Zakona o konkurenciji (u daljem tekstu: Zakon) i čl. 8. 9. i 10. Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 95/06) te je Konkurencijsko vijeće, u skladu s članom 31. istog Zakona, zatražilo dopunu dana 14.10.2008. godine dopisom broj 01-02-26-041-1-II/08.

Predmetna Prijava je dopunjena dana 22.10.2008. godine dopisom broj 01-02-26-041-2-II/08 i dana 28.10.2008. godine dopisom broj 01-02-26-041-3-II/08.

Konkurencijsko vijeće je dana 13.11.2008. godine dopisom broj 01-02-26-041-6-II/08 Podnosiocu prijave izdalo Potvrdu o prijemu uredne i kompletne Prijave (u daljem tekstu: Potvrda), u smislu člana 30. stav (3) Zakona.

Podnosilac prijave je naveo da nema obavezu podnijeti zahtjev za ocjenu koncentracije nekom drugom tijelu izvan teritorije Bosne i Hercegovine, u smislu člana 30. stav (2) Zakona.

Konkurencijsko vijeće u postupku ocjene dopuštenosti predmetne koncentracije je utvrdilo sljedeće činjenice:

Prijava namjere koncentracije je podnesena u zakonom propisanom roku, u smislu člana 16. stav (1) Zakona.

1. Učesnici predmetne koncentracije

Učesnici predmetne koncentracije su privredni subjekt PHOENIX PIB Austria Beteiligungs GmbH, Albert-Schweizer-Gasse 3, 1140 Beč, Austrija i privredni subjekt Pharmanova Bel d.o.o., Stefana Dečanskog bb, Bijeljina, Bosna i Hercegovina.

1.1. Privredni subjekt Phoenix Pib

Privredni subjekt PHOENIX PIB Austria Beteiligungs GmbH, Albert-Schweizer-Gasse 3, 1140 Beč, Austrija je registrovan u Trgovinskom sudu u Beču pod brojm FN 291986 t dana 02.04.2007. godine.

Osnovna registrovana djelatnost privrednog subjekta Phoenix Pib je sticanje, držanje i prodaja udjela u kompanijama.

Privredni subjekt Phoenix Pib, odnosno Phoenix grupa, do sada nije bio prisutna na tržištu Bosne i Hercegovine pa tako ne posjeduje ni tržišni udio na istom.

1.2. Privredni subjekt Pharmanova Bel

Privredni subjekt Pharmanova Bel d.o.o. Bijeljina, Stefana Dečanskog bb, Bijeljina, Bosna i Hercegovina registrovan je u Opštinskom sudu u Bijeljini pod registarskim brojem 1-4120 dana 16.07.1997. godine.

Osnovna registrovana djelatnost privrednog subjekta Pharmanova Bel je veleprodaje širokog asortimana uvoznih i domaćih farmaceutskih proizvoda, proizvoda za njegu zdravlja široke potrošnje, hirurškog materijala i kozmetike. Glavni kupci ovih proizvoda su apoteke, farmaceutske ustanove i veliki medicinski centri u Bosni i Hercegovini.

2. Obaveza prijave namjere koncentracije

Ukupni ostvareni godišnji prihodi učesnika koncentracije na dan 31.12.2007. godine iznosili su:

Tabela 1.

Ukupni prihod	Phoenix grupa		Phoenix Pib	Pharmanova Bel (KM)
	EUR	KM		
Svijet	(..)* ¹	(..)*	-	(..)*
BiH	-	-	-	(..)*

Ukupan prihod Phoenix grupe ostvaren prodajom roba na svjetskom tržištu iznosi preko 100.000.000,00 KM po završnom računu u godini koja je prethodila koncentraciji, a s obzirom da je privredni subjekt Pharmanova Bel registrovan na teritoriji Bosne i Hercegovine učesnici koncentracije su bili u obavezi podnijeti Prijavu u skladu sa članom 14. stav (1) Zakona.

¹ (..)* - podaci predstavljaju poslovnu tajnu

3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti predmetne koncentracije primjenilo odredbe Zakona, Odluke o utvrđivanju relevantnog tržišta («Službeni glasnik BiH», broj 18/06) te Odluke o načinu podnošenja prijave i kriterijima za ocjenu koncentracija privrednih subjekata.

4. Pravni osnov i oblik koncentracije

Pravni osnov predmetne koncentracije je Ugovor o prenosu vlasničkih udjela zaključen dana 29. septembra 2008. godine u Beču, Austrija između privrednog subjekta Phoenix Pib i vlasnika udjela u privrednom subjektu Pharmanova Bel i to (...) * koji su se obavezali da prenesu ukupno 100% svojih pojedinačnih vlasničkih udjela u osnovnom kapitalu Pharmanova Bel privrednom subjektu Phoenix Pib.

Pravni oblik koncentracije podrazumijeva stjecanje kontrole privrednog subjekata Phoenix Pib nad privrednim subjektom Pharmanova Bel kupovinom većinskog udjela osnovnog kapitala u skladu sa članom 12. stav (1) pod b) pod 1. Zakona.

5. Relevantno tržište

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta relevantno tržište proizvoda obuhvaća sve proizvode i/ili usluge za koje potrošači smatraju da su međusobno zamjenjive s obzirom na njihove bitne karakteristike, kvalitet, namjenu, cijenu ili način upotrebe.

Nadalje, prema članu 5. Odluke o utvrđivanju relevantnog tržišta relevantno tržište u geografskom smislu obuhvaća cijelu ili dio teritorije Bosne i Hercegovine, na kojoj tržišni konkurenti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Relevantno tržišta proizvoda predmetne koncentracije je tržište veleprodaje farmaceutskih proizvoda.

Relevantnim geografskim tržištem smatra se tržište Bosne i Hercegovine.

U tom smislu, relevantnim tržištem predmetne koncentracije smatra se tržište veleprodaje farmaceutskih proizvoda na cijeloj teritoriji Bosne i Hercegovine.

6. Analiza relevantnog tržišta

Privredni subjekt Phoenix Pib nije aktivan na tržištu veleprodaje farmaceutskih proizvoda u Bosni i Hercegovini.

Privredni subjekat Pharmanova Bel se bavi veleprodajom farmaceutskih proizvoda na cijeloj teritoriji Bosne i Hercegovine.

Prema podacima iz Prijave, a koji se zasnivaju na podacima Agencije za posredničke, informatičke i finansijske usluge tržišni udjeli privrednog subjekta Pharmanova Bel i glavnih konkurenata na tržištu veleprodaje farmaceutskih proizvoda u Bosni i Hercegovini u 2007. godini su:

Tabela 2.

Redni broj	Naziv privrednog subjekta	Tržišni udjeli (%)
1.	Hercegovinalijek - Mostar	13,87
2.	Pharmanova Bel – Bijeljina	10,48
3.	Tuzla Farm – Tuzla	8,48

4.	Krajinalijek – Banja Luka	8,32
5.	Interpromet – Novi Grad	8,25
6.	MGM – Kakanj	7,15
7.	Farmavita - Sarajevo	5,87
8.	Medimpex – Sarajevo	5,84
9.	Melcom - Mostar	4,89
10.	Velfarm - Gračanica	4,57
11.	Una Farmacija – Bihać	3,92
12.	Blagoleks - Bijeljina	3,34
13.	Sarajevolijek - Sarajevo	2,40
14.	Oktal Pharma - Sarajevo	2,36
15.	Vetfarm - Višegrad	2,31
	Ostali	7,95
	UKUPNO	100,0

Iz navedenog proizilazi da tržišni udio privrednog subjekta Pharmanova Bel na tržištu Bosne i Hercegovine iznosi oko 10,48%, a pošto privredni subjekt Phoenix Pib na tržištu Bosne i Hercegovine nema tržišni udio neće doći do povećanja tržišnog udjela učesnika koncentracije na relevantnom tržištu.

7. Ocjena predmetne koncentracije

Konkurencijsko vijeće je, nakon procjene i analize podataka i utvrđenih činjenica u smislu člana 17. Zakona u postupku donošenja predmetnog Rješenja ocijenilo da provođenje predmetne koncentracije neće narušiti postojeću tržišnu konkurenciju s obzirom da privredni subjekt Phoenix Pib nije prisutan na tržištu Bosne i Hercegovine.

Konkurencijsko vijeće je utvrdilo da se predmetnom koncentracijom privrednih subjekata ne stvara i ne jača dominantan položaj na relevantnom tržištu veleprodaje farmaceutskih proizvoda u Bosni i Hercegovini te je odlučilo kao u dispozitivu ovog Rješenja.

8. Administrativna taksa

Na ovo Rješenje podnosilac Prijave, u skladu s članom 2. tarifni broj 107. stav (1) tačka d) 1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

9. Pouka o pravnom lijeku

Protiv ovog Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja odnosno od dana njegovog objavljivanja.

Predsjednik

Ibrica Lakišić